



起點

佇人的一生中，會經歷足濟無全款的階段，就親像比賽，愛認真對起點開始，閣愛跔踏實地堅持到底。凡事攏有起點，猶毋過「起點」到底是啥物？比賽的時銃聲是起點，嘆仔聲佻鼓勵的喝咻是終點。起點會使是日頭拄出來的早起，會使是新生命的誕生，閣會當是人生中所面臨的新階段。干焦學習，是有起點煞無終點的一段性命的旅途。捌字是讀冊的起點、字母是英文的起點、數字是數學的起點。準做有閣較好的頭腦，無遮的基礎做起點，就袂有閣較進階的學習。

有人捌講過：「失敗是成功的起點。」袂少成功的人起點攏是失敗的。有一寡人就是袂堪得失敗，所以永遠無法度來到成功的大路。佇咧達到成功進前，路途中可能有障礙阻擋咱向前行，所以咱需要去面對、解決，毋是逃避佻放棄。嘛有一寡人做代誌認真要求完美，失敗的時煞無法度閣倚起來。若是換一個角度來想，失敗只不過是另外一個起點，毋通因為小可仔失覺察，影響未來的發展。發生過錯誤，無定著後擺就會成功。

比如講謝坤山先生，伊原本是四肢健全的人，但是因為意外，煞來失去雙手佻雙跔，毋過伊並無放棄家己，顛倒勇敢面對困境，終其尾成做一個有名的口足畫家。高中畢業彼年，我因為考試無理想所以無學校通讀，彼陣的心情足艱苦，佳哉阿母閣予我機會，予我去補習班準備重考。總是我無考著家己想欲讀的系，所以先讀暗學仔，日時就準備轉學的考試。雖然準備的過程足辛苦，嘛對家己無信心，毋過放榜的彼一日，是我人生中上歡喜的時陣，因為我考牢矣！經歷過遮的代誌，予我佇未來若拄著困難，會使閣較有信心來解決。

萬事起頭難，逐項代誌嘛攏有起點，這關若袂得過，是欲按怎面對繼落去的考驗咧？閣較艱難，嘛是愛去接受，只要度過上困難的彼關，後壁就會食著甘甜的果子。先苦而後甘，起點雖然艱難，不而過會當成就家己，為家己鋪好未來所欲行的路。

作者：戴凡瑄

☆詞彙學習☆

- | | |
|---------------------------------------|--|
| 【嘆仔聲】phòk-á-siann：掌聲。 | 【無定著】bô-tiānn-tiòh：也許、說不定。 |
| 【喝咻】huah-hiu：大聲叫嚷。 | 【終其尾】tsiong-kî-bué/tsiong-kî-bé：最終、終究。 |
| 【干焦】kan-na：又唸作 kan-tann、kan-ta。只有、僅僅。 | 【暗學仔】àm-òh-á：夜校。 |
| 【失覺察】sit-kak-tshat：不留神、疏忽。 | 【不而過】put-jî-kò/put-lî-kò：但是、不過。 |